

Inatsisartut suleriaasianni § 33 naapertorlugu matumuuna Inatsisartut aalajangiiffigisassaattut siunnersuut imaattoq saqqummiuppara:

Nunatsinni innarluutilinnik sullissisuusut ilinniagaqarnissamut piginnaangorsarnissamullu pisariaqartitaat aallaavigalugit Naalakkersuisut iliuusissamik suliassamullu piareersaasiamik innarluutilinnik sullissinermi piginnaangorsarnissamut pisariaqartitat tamakkiisumik pigilernissaannut tikkuussisunik UPA 2015-mut saqqummiusseqqullugit peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq Ruth Heilmann, Siumut)

Tunngavilersuut:

Ullumikkut bokollektivini, orniguttarfinni, ulloq unnuarlu angerlarsimaffinni aammalu utoqqaat angerlarsimaffini innarluutilinnik sullissisuusut ilinniarsimagunik ilinniarsimangikkaluarunilluunniit pikkorissarnissamut periarfissaat pitsaanerusariaqarput. Sulisitsisutik aqutigeqqaarnagit pikkorissarnissamut qinnuteqarsinnaasariaqarput pikkorissarsinnaasariaqarlutillumi.

Nunatsinni pædagogissaaleqineq isumaginninnikkullu ilinniarsimasunik amigaateqarneq annertoorujussuaq suli atuuppoq. Amigaatigineqartut pissarsiarineqarsinnaatinnagit innarluuteqartullu nunatsinni sulissunneqarnissaat pitsaanerpaaq angusariaqarparput. Ullumikkut piukkunnaatillit ilinniarsimangitsut amerlasuut atorneqarput tamannali qujanaqaaq, kisiannili taamatut sulinissamut tunniusimalluarneq aalajaatsuunerlu atuukkaluartillugu oqaatigisariaqartoq unaavoq pikkorissaaneq taakkununga pisariaqartinneqarluinnarpoq aammalu pikkorissaanerit ataavartumik ingerlanneqartuartariaqarput. Suliamut ilisimasakinneq suliamut tunniusimanissaraluumut aamma millisaataasartoq nalunngilarput tamannalu nunatsinni aamma qaangerniassallugu pisariaqarluinnarpoq.

Taamatut pikkorissaanermik ingerlatsinissaq piumasaqaatigissallugu pisariaqarpoq aamma pikkorissareersut pikkorissarnerminni allagartamik pissarsisinneqartarnissaat. Tassani suleqqinnissaminnut sakkussaannik tunineqassammata taamalu aamma iluaqutaassalluni sulisut paarlakaannerujussuannik ajornartorsiutaasumut millisaataasumik tamanna kinguneqarsinnaammat.

Ullumikkut suliffissarsiortut sulisussatut tiguinnarneqartarnerat taamaalilluni qaangeriartuaarneqassaaq pikkorissarnikummi aamma atorfinivitsinneqassagamik taamaalillunilu suliffivimmisut isigalugu pikkoriffigalugu ataavartumik sulinissaminnut tunngavissinneqarsinnaalissagamik. Minnerunngitsumillu taamaaliornikkut suliffissaaleqisunut naqitsiartortartut ikilinerannik aamma kinguneqartinneqassagami, tamannalu iluatinnartuuvoq pineqartunut ilaqutariit aningaasaqarnerannut aammalu sullinneqartunut inuiaqatigiinnullu

pitsaasumik kinguneqartussaagami, aamma innarluutillit siunissami nunatsinni sullinneqartuarnissaannik ineriartortitsinermut taamalu qallunaat nunaannut suli aallartitsisoqartarnera akuersaaruminaalluinnarmat, tamannami inuit pisinnaatitaaffiit naapertuussorinangilluinnarpoq.

Taamaamat siunnersuutigaara innarluutilinnik sullissit ilinniaqqinnissamut piginnaangorsarnissamullu periarfissaat eqqarsaatigalugit siunnerfilimmik aqqissuussinissaq. Tamanna pissaq iliuusissamik suliassamullu piareersaasiamik pisariaqartitat aallaavigalugit saqqummiussinikkut.

Erseqqissaatiginngitsoorusunngilara Inatsisartuni UKA 2012-mi imm. 101 akuersissutiginerani FN-ip innarluutillit pillugit isumaqatigiissutaat nunatsinni atuuttussanngortikkatsigu. Aamma taamanikkut Naalackersuisut nunatsinni innarluutilinnik sullissinerup sukumiisumik misissuiffigineqarnissaa oqariartuutigaat. Taamaamat matumuuna Naalackersuisunut ujarorusuppara misissuineq tamanna sumut killissimanersoq, maannangaarli erseqqissaatigereerlugu innarluutilinnik sullissinitsinni sulisunik piginnaangorsajuarnissamik pisariaqartitsiuarnitta naqissusernissaa, tassami ineriartortitsinissamik pisariaqartitsinerput ataavartuummat.

Siunnersuutip aningaasatigut allaffissornikkullu pisortanut kinguneqaatissai

Iliuusissamik suliassamullu piareersaasiamik saqqummiussinissaq Namminersorlutik Oqartussanut allaffissornikkut aningaasartuutaanissaa naatsorsuutigineqarpoq. Taamannak suliagarneq AC-tut atorfillip qaammatit pingasut iluani sulineranik naleqassasoq naatsorsuutigineqarpoq, aningaasanngorlugu 125.000 kr.-nik naleqassangatinneqarluni. Innarluutilinnik sullissinerup misissuiffigineqarnera aammalu pilersaarutaareersut allat eqqarsaatigalugit aningaasanik atugassanik immikoortitsereertoqarsimassasoq naatsorsuutigineqarpoq.

Siunnersuutip namminersorlutik inuussutissarsiortunut allaffissornikkut aningaasatigullu kinguneqaatissai

Soqanngilaq.

Siunnersuutip innuttaasunut allaffissornikkut aningaasatigullu kinguneqaatissai

Soqanngilaq.